



JUDICIAL SYSTEM MONITORING PROGRAMME  
PROGRAMA MONITORIZASAUN BA SISTEMA JUDISIÁRI

*Komunikadu Imprensa*  
*Tribunál Distritál Díli*  
*5 Dezembru 2013*

**Arguidu ba kazu krime danu agravadu iha Suco Samalete- Distritu Ermera konklui ho pena prizaun no restu suspendidu**

Iha 5 Dezembru 2013, Tribunál Distritál Díli, lee leitura akordaun ba kazu krime danu agravadu iha Distritu Ermera. Arguidu ba kazu ne'e hamutuk nain 9 (*Jacinto Maurico, António Soares, Sibriano Soares, Joãnico F. Soares, Antonio Cosvari, Abilio Soares, Casmiro Soares, Agustino Soares no Fransisco Mau Bere*).

Ministériu Públiku akuza katak iha 6 Fevereiru 2013, tuku 9:00 arguidu sira hakilar husi laletek no tuda vítima sira nia uma no la-kleur sira lori gazolina hodi sunu lezadu Afonso Moraun no Roberto da Costa Gomes nia uma.

Konsekuensia husi arguidu sira nia hahalok ne'e rezulta vítima sira lakon sira nia uma no sasan tomak iha uma laran. Kazu ne'e tanba arguidu sira laran moras ba vítima sira ne'ebé iha tinan 1999, 2003 no 2006, estragus arguidu sira nia uma no sasan.

“Dezisaun ba kazu ne'e hanesan lisaun sosial ida ba comunidade tomak atu aprende oinsa maneija sira nia konfliktu no evita uja aprosimasaun violéntu hodi buka solusaun ba sira nia kazu, selae ikus mai tenke ba hatan iha tribunál hanesan mos saida mak akontese ba kazu ne'e.”, dehan Diretór Ezekutivu JSMP Luis de Oliveira Sampaio.

Ministériu Públiku akuza arguidu nain tolu nu'udar autór materiál ba krime ne'ebé preve iha artigu 259 Kódigu Penál kona-bá danu agravadu .

Iha audiénsia, arguidu sira konfesa katak faktus sira ne'ebé konsta iha akuzasaun Ministériu Públiku nian loos hotu. Lezada no testemuña nia depoimentu ba tribunál reforsa katak arguidu sira duni mak komete hahalok sira ne'e ba vítima sira no familia tomak.

Bazeia ba faktus ne'ebé produs iha audiénsia julgamentu, tribunál konklui hodi aplika pena prizaun tinan 6 ba arguidu *Jazinto Morico*, ba arguidu *Antonio Soares no Cipriano Soares* aplika pena tinan 4 prizaun.

Ba arguidu nain 5 seluk (*Joanico F. Soares, Antonio Cosvari, Abilio Soares no Casmiro Soares Agustino Soares*) tribunál aplika pena prizaun tinan 3 no suspende ba tinan 5. Enkuantu, ba arguidu *Fransisco Mau Bere* tribunál absolve husi akuzasaun tanba la provadu involve iha krime ne'e.

Kazu ne'e rejista ho númeru prosesu: 267/2013/TDD. Julgamentu ba leitura akordaun prezide husi juis Dr. António do Carmo, Dr. Julio Gantes no Dra. Jumiati Freitas (representa juis koleтиву). Ministériu Públiku representa husi Dr. Nelson de Carvalho no Dr. Jacinto Babo. Arguida hetan defeza husi Dr. Amado de Almeida no Dr. Jose da Silva husi Eskritóriu Defensória Públiku.

Atu hetan informasaun kompleitu, favor kontaktu:

Luis de Oliveira Sampaio  
Diretór Ezekutivu JSMP  
Diresaun e-mail: [luis@jsmp.minihub.org](mailto:luis@jsmp.minihub.org)  
[info@jsmp.minihub.org](mailto:info@jsmp.minihub.org)  
Telefone:3323883 |  
Website: [www.jsmp.tl](http://www.jsmp.tl)  
Face book: [www.facebook.com/timorleste.jsmp](http://www.facebook.com/timorleste.jsmp)  
Twitter: @JSMPTl